

REGIONAL NEWS BULLETIN

Date – 05/11/2024 Time - 7:30 -7:40Hrs

HEADLINES (MORNING)

- Tukin dar 7 atang khan Sinlung Hills Council bial 12-a inthlanna atan vote thlak tan a ni.
- Mizoram Youth Commission Chairman Pu Malsawmzuala Ralte chuan Taiwan leh India-in hnathawk inthawn tawna thuthlung an neih chu Mizoram atanga tan a nih tur thu a sawi.
- Canada-a Ontario-a inlakhran duha kal fawr hoin Hindu temple an bei chu India chuan na takin a dem tih a sawi
- Vawiinah US President 47-na thlan a ni dawn.



SHC POLLS

Tukin dar 7 atang khan Sinlung Hills Council bial 12-a inthlanna atan vote thlak tan a ni.

Mizoram State Election Commission Secretary Pu K. Laldingliana chuan Sinlung Hills Council inthlan neih tur atana inbuatsaihna chu peih fel a nih tawh thu hi nimin khan a sawi a. Tukin zing dar 7 atanga tlai dar 4 thleng ballot paper hmanga vote thlak a ni dawn a. Vote tla tur a tlak zawh a, vote thlakna ballot box-te chu bial tin hmunpui a kim taka phurh thlen a nih hnuah vote tlate hi tlai lamah chhiar nghal a ni ang. Venhimna pawh District pathum a District Election Officer leh SP theuh-te ruahmanna ang a uluk taka ruahman a ni, a ti. Pu K. Laldingliana chuan Sinlung Hills Council inthlanna lo awm turah hian Polling station venhimna uluk zual ngai (critical polling station) 16 a awm thu leh Quick Response Team-te pawh uluk taka duty tura ruahmanna siam a nih thu sawiin Assam leh Manipur hnaih ramri-ah te pawh tul bik natna leh chhiat tawh tih lovah chuan veivak awm lo tura ramri khar vek a nih thu a sawi bawk.

Pu K. Laldingliana chuan vote nei zawng zawngte vote thlak turin a sawm a. Boruak muanawm tak hnuai a inthlanna kalpui a nih theih na'n political party, tlawmngai pawl leh mipui zawng zawng thawhpaina a ngen bawk a ni.

State Election Commission Secretary chuan Sinlung Hills Council-ah vote nei mipa-11,875 leh hmeichhia 11,914 an vaiin vote nei 23,789 an awm thu a sawi a. Inthlan hmasak ber, kum 2019 inthlan a vote nei mi 20,914 nena khaikhinin, vote nei punna zat chu 2,875 a nih thu a sawi bawk.

Sinlung Hills Council inthlanna chuhtute hi BJP-1, INC-12, MNF-10, ZPM-8, HPC-4 leh independent 14, an vaiin 49 an ni a. Bial 12 awma bial 6 hi Aizawl

district-ah awmin Saitual district-ah bial 4 leh Kolasib district-ah bial 2 a awm bawka ni.

Inthlan campaign hi Pathianni tlai dar 4 khan a tawp a, political party leh candidate-te erawh chuan Inrinni tlai lam khan campaign hi an khar tawh a. Campaign chhung hian election model code of conduct bawhchhiatna lian tham a awm thu an dawng lo niin state election commissioner Dr. H. Lalthlangliana chuan a sawi a ni.



COMPENSATION

Lawngtlai District Land Owners' Association chuan kumin chhung ngeia zangnadawmna peturin thuneitute an ngen nawn a, kawngchhelai helna siamtumna awm chu natakin an dodal thu an sawi.

Kaladan Multi Modal Transit Transport Project hnuai Lawngtlai atanga Myanmar pawha kawngpui sial, Multi Modal kawngpui tia hriatlar, National Highway 502 'A' a ram neitu intelkhawmte chuan Anti Corruption Beureu (ACB) in an ram pass te ngun taka a chhuichian hnuah, High Court in ram neitu diktak mi 138 te chu zangnadawmna pek theih a nih thu a tihchian hnuah pawh November ni 4, Thawttanni thlenga zangnadawmna an hmu lo chu engtiang kawng maha ngaihthiam theih a nih loh thu an sawi nawn a, nikum 2023 August thla atang khan helai kawngpui thawmthat an remtih loh chu an dinna ngaiah an la ding reng tih Ramneitute chuan an sawi.

Nimin khan Ram neitute hi Multi Modal kawngpuiah hian pungkawmin, kumin July thlaa Lawngtlai atanga KM 11 a kawngpui bung chu Lawngtlai DC remtihinain ABCI ten hmundanga kawngpui siamna tur lunglakna kalkawng atan sialtlang an tum chu a hmunah ABCI lam te thil awmdan hrilhfiain Company lam pawh hi an khawl te nen an let.

Lawngtlai District Land Owners' Association hruaitute chuan helai kawng sialtlang an remtih loh chungchangah mipui tawrhna thleng leh thlengzui theite chu pawh an tih thu an sawi a, an dinhmun hriatthiamsak turin mipui an ngen a, thuneitu lam pawn rangtakin zangnadawmna pethuaise an duh thu an sawi.



MYC

Mizoram Youth Commission Chairman Pu Malsawmzuala Ralte chuan Taiwan leh India-in hnathawk inthawn tawna thuthlung an neih chu Mizoram atanga tan a nih tur thu a sawi.

Mizoram Youth Commission Chairman chuan Taiwan Ambassador pawh Mizoramah rawn kalin MYC pisa-ah a len luh thu a sawi a, he hmalakna bawhzui hian Mizo nula pahnih, Sarah Lalrohui leh C. Vanlalruati te chu Taiwan-ah Mandarin tawng zira an awm mek thu leh an thil zirte an thiam hunah Mizoramah rawn haw thla lehin Mizoram Youth Commission hnuai an thalai puite mandarin tawng an zirtir ve leh chhawn tur thu a sawi. Akashvani Aizawl Correspondent nena inkawmna-ah an neihah hian Pu Malsawmzuala Ralte chuan Japan International

Cooperation Agency (JICA) leh Mizoram Youth Commission-in thawhhona an neih tur thu pawh a sawi a ni.

Street Cities Special Economic Zone hnuai India ram chhunga Company lian tak takte hmalakna kal zelah Mizo thalaite hnathawh theih tur chu Mizoram Youth Commission pawh hriattir an ni a. He mi atan hian Mizo thalai 230 te'n dilna MYC-ah hian theh lut tawhin hmalak mek a ni a, MYC pawhin thalai eng emaw zat chu hnathawk thei tura thawnchhuah an beisei bawk niin a sawi.

He'ng bakah hian MYC leh The Lalit-te chuan thawhhona thuthlung ziakin Mizo nula eng emaw zat chuan spa therapy training an bei mek a, training an zawh ve leh India hmun hrang hranga Lalit hotel-ah te spa therapist hna an thawk tan dawn bawk a ni. Vishan foundation leh Mizoram Youth Commission-te thawhhona hnuai Aizawla MYC pisa-ah Mizo thalai 33-te training mekin an training zawh hunah hna pawh an hnuh nghal MYC chuan a beisei a, he training hi Lungleiah pawh kalpui tum mek a ni, a ti a ni.



AIS, ZRF MEETS CM

Chief Minister Pu Lalduhoma chuan nimin khan a pisa-ah Mizoramin All India Services Cadre hran a neih ve theih dan tur chungchang Mizoram IAS Association hruaitute, All India Services member dangte bakah Zoram Research Foundation hotute a sawipui.

Inkawmna-ah hian hemi chungchanga hmalakna lo awm tawhte sawi lan a ni a. Cadre hran neih that bikzia leh lukhawng a neih bikziate pawh sawi niin, sorkar tharah beiseina sang tak nen tha thar a hmalakna awmze nei leh zual kalpui an duh thu an sawi a. Chief Minister chuan, he thil hi a kaihhruai sorkar pawhin a duh leh a rualawhna a nih thute, nasa leh zual a bawhzui a duh thu te a lo hrilh a. Cabinet thutkhawmna-ah sawiho tura chhawp chhuah a lo tum tur thu a hrilh a ni.

He hunah hian Mizoram IAS Association atangin Pu Vanhela Pachuau, Pu C. Ropianga, Pu Lungmuana, Pu Lalzirmawia Chhange te an tel a. Indian Police Service atangin Pu Lalrokhuma Pachuau, Pu C. Dothanga, Pu P. C. Lallawmsanga, Pu Zorammawia leh Pu C. Laldina te telin; Zoram Research Foundation atangin Prof. Thangchungnunga leh Pu Rochamliaana te an tel a ni.



MATCH FIXING

Mizoram chhunga Football inelna sang ber Mizoram Premier League season 11-na khelzawh takah khan thamna (match fixing) tam tak a awm tih hmuh chhuah a ni a, he thil avang hian Mizoram Football Association (MFA) chuan hemi thila inhnamhnawih mi eng emawzat a hrem.

Nizana MFA thuchhuahin a tarlan danin player 24 chu thama thilah hian hrem an ni a, match official pathum bakah club pathum Sihphir Venghlun, FC Bethlehem leh Ramhlun Athletic te chu hrem an ni a, club pathumte hi kum thum chhung chu Mizoram chhunga football inelna hmachhawn thei lo tura tih an ni.

Player zingah Lalnunzama (Chanmari FC) leh L Lotha (FC Bethlehem) te chu an dam chhunga inkhel thei tawh lo tura hrem niin, player dangte chu kum khat, kum thum leh kum nga chhung atan hrem an ni thung.



CM RF

Nimin khan Chief Minister Pu Lalduhoma chuan a hnenah CM Relief Fund tanpuina diltu Roslyn Kimbuang hnenah cheng nuai khat a hlan.

Roslyn Kimbuang hian an state a chi leh chi inkara tharum thawhna a chhuah avangin Manipur atangin hnuchham naupang a enkawl lai mi 24 te chu sahimna zawngin Mizoramah a rawn tlanpui a. Mizoram sawrkar chuan Berawtlang Tourism Convention Centre-ah a awmtir a. Naupangte hian an hnaivai sikulah zirna an chhunzawm mek a ni.

Roslyn Kimbuang hian, Zo Inspiration Foundation ten an lo puiah tawh thu Chief Minister hi a hrilh a, chubak chu a tla chawpin naupangte ei leh in tur a thiam ang anga a dap thin thu a sawi baw. CM RF thahnemtak a pek avangin Chief Minister chungah hian a lawm tak zet tih a tarlang niin sorkar thuchhuah chuan a sawi.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.



CANADA TEMPLE ATTACKED

Canada-a Ontario-a inlakhnan duha kal fawr hoin Hindu temple an bei chu India chuan na takin a dem tih a sawi. New Delhi chuan Canada-a India mite himna a ngai thutak hle tih a tarlang baw.

Prime Minister Narendra Modia chuan hetiang mi dawizep ten ram aiawh palaite vau nana an che chu a dem thu social media ah a tarlang a. Hetiang tharum thawhna hian ram dinhmun a sawi nghing pha lo a ti a. Pu Modia chuan Canada sawrkar chu dan hnuai rorelna kengkawh turin a phut thu a sawi a ni.

External Affairs Ministry thupuangtu Randhir Jaiswal chuan Canada sawrkar chu sakhaw biak in hrang hrangte hetiang beih a nih tawh loh nana venghim turin a ngen a. India chuan hetiang pawikhawihnaa telte hi hrem ngei a phut ti baw. Indian Ottawa-a Indian High Commission chuan thuchhuah siamin Brampton, Ontario Consular camp kianga tharum thawh na thleng chu pawitih thu a sawi a ni.



US PRESIDENT

Vawiihah US President 47-na thlan a ni dawn. President inthlan hi Republican candidate leh President hlui Donald Trump leh Democratic candidate leh Vice President nilai Kamala Harris ten an chuh a. Nimin campaign tawp ni khan hmun state pawimawh pahnih Pennsylvania leh Michigan ah te vantlang inkhawm an nei a. Pi Harris-i hian Pennsylvania state-a Allentown, Pittsburgh leh Philadelphia ah te hun an hmang a. Heitihlai hian Donald Trump-a chuan North Carolina-a hun a hman hnuah Pennsylvania leh Michigan ah hun a hmang leh a ni. Kan correspondent report i lo ngaithla ang u.

